

DISSERTATIO MEDICA

10

INAUGURALIS,

DE

PESTE.

AUCTORE GEORGIO BARCLAY.

PESTIS vel Pestilentia vocabulo Hebraico *Pasat*, spoliare, vimque eandem ac *λοιμος* Graecorum habens, fere omnibus terris sed multo maximè solis ardore exustis, a mundi primordiis semper notissima fuit; verùm anne illa eadem cum Peste hodierna fuerit, hactenùs in occulto latet; neque certa extant signa quae hac de re unquam dilucidè docerent; ut luem autem ad iram Deorum Immortalium referendam, nullaque medicinâ sanabilem, antiquis eam apparuisse constat,

A

[1820]



quaestio potiùs fortassè curiosa quàm gravissima habenda est ; neque ante Procopii vel Evagrii scripta (A. D. 543) veram Pestis recentis historiam rectè quaerere oportet.

DEFINITIO.

Variae Pestis species auctoribus variis indicantur. Medici Massilienses an. 1720, quinque varietates annumerârunt. — Chenôt de septem, Russelus de sex in longum loquitur ; dissertatione* autèm de Peste Melitensi recente, feliciter ad tres limitantur ; quin tertia ibi descripta, levioribus tantum indiciis ab aliis dignosci possit, Pestis qualis eo saltem tempore fuit, species mihi duas solummodo agnoscere apparuit, quas Culleno ac Linnaeo delineatas invenias. Hic enim primam, ille secundam speciem tantum, in definitione sua comprehendit ; nam hisce verbis Cullenus :
 “ Typhus maxime contagiosa cum summa

* Ed. Med. and Surg. Journal, April 1814.

debilitate, incerto morbi die eruptio bubonum vel anthracum.” At alio modo Linnaeus, “ Anthraces aut bubones gangraenosi, febris synocha acutissima, funestissima, vertigo, anxietas, lipyria.” Revera tamen parùm variat speciatim, nisi febris genere comitantis, seu synocha seu typhus sit ; porò ab aliis sub formâ intermittente vel remittente in Egypto occurrere dicitur, at ubi tantulum adhuc cognitum est parùm animadvertere prosit.

HISTORIA MORBI.

Pestis de improvisò adoritur, atque omnium maximè morborum ab regula declinat, secundùm aegri aetatem temperamentumque, non secus ac coeli temperiem varians, aliquando cursum adeo celeriter percurrens, ut aeger, impetu quasi repentino perterritus, brevi sub ictu morbi obruitur. Sic quidam Peste affectus, sextâ deinde horâ sub oculis

Larrei periit, exemplumque magis adhuc insolitum, Corcyrae nuperrime incidisse dicitur,* quo horâ post contactum tertia, aeger animam efflavit. In iis ac similibus tam citò raptis, vix ad signa propria evolvenda tempus dari videtur, rarò saltèm in pessimis apparent donec cadavere livido morbus denique indicatur. Ferè nunquam tamen adeò velociter appropinquat, sed miris saepe modis quasi levis ac inconstans, ita ut scrutinium subtilissimum aequè ac providentiam cautissimam aliquandò omninò fallat; hinc ante omnes morbus Proteiformis jure nominari meretur: dixit Russelus se vix unquam in duobus exemplis eadem signa vidisse, neque reverà ullum constat indicium quod in Pestis naturâ omninò positum est; etenim Diemberoeckeo aliisque fide dignissimis exempla sine febre proferuntur, et tumorum absentia omnium nequaquam infrequens est. His praemissis de signis usitatioribus agendum est, atque ea, ut in Peste Melitensi nota-

* Investig. Senatûs de Contag. Pest.

verim, maximè indicabo, varietates tantùm supradictas exequens, quod eo modo res meliùs ac faciliùs exponeretur.

Saepe horrore praeunte species prima huiusmodi indiciis dignoscitur; vires maximè subitoque collabuntur; vultus fit pallidus vel sublividus, saepe ferus; oculi miris in modis turbidi; aeger titubat et gressus infirmus est; vertigo ac stupor superveniunt; ferè semper urget nausea, saepe bilis vomitus; lingua citò fit sordibus obducta, aliquando apice rubro, sed parùm plerumque mutata; dolet caput; ardent cum summâ anxietate praecordia; pulsus frequens est et facile praeter solitum incitatur, id quod saepissimè experiendo didici; cutis arida et ardens vel sudore splendida; sitis non omnino perpetua sed saepe graviter urget; comitantur delirium, syncope, coma, subsultus tendinum, &c. glandularum tumores, maximè inguinibus, et carbunculi passim per cutem oriuntur; sanguis nonnunquam ex naribus fluit; sub finem vibices, maculae petechiaeque sese osten-

dunt, convulsionibusque aliquando aeger tandem abripitur.

Vero incipit altera species dolore capitis vehementissimo vixque tolerando, cum vertigine ac stupore gravissimo; vultus oculique sanguine suffusi sunt, quasi aeger Bacchi stimulis incitatus esset; modoque loqui vel moveri piget; pulsus validissimi, frequentissimi; sitis insedabilis; alvus nisi adsit diarrhoea saepe pertinaciter adstricta; incertoque, ut supra, tempore, erumpunt tumores et exanthemata.

Signa autem maximi momenti sunt visus turbidus Diemerbroeckei, cum stupore ac vertigine ebrietatis instar, quae nemo qui morbum hunc vidit nesciat, nemo vidit quin notare oporteat, ut ferè in Pestis natura posita, quorum ratio tamen satis in tenebris latet.

Bubones indicia morbi propria considerari debent, dolore pungente et partis rubore, praecessi, plerumque inguine, aliquandò alis, minime parotide vel maxillis oriuntur. Ex tabulis Russeli patet quod saepiùs inguina

quàm axillae afficiuntur proportione 3 ad 2. Ex novem legionis Rollensis Peste Melitae affectis, quorum cura partim mihi commissa est, in uno tantùm, nisi memoria fallat, axillae, in aliis autem inguina afficiebantur. Narra- rat Jacobus M^cGrigor eques, se exemplum vidisse quo tumores, inguine, parotide, alis, glandula maxillari, et sublinguali eodem tempore apparuerunt. *

Docet Russelus bubones certos Pestis tes- tes habendos esse; atque in Aleppi historiâ narratur, eos in omnibus occurrere, nisi quos morbus subitò corripere; secundùm Meade- um, nunquam nisi formis Pestis pessimis de- sunt et hinc ut dicitur, medici Massilienses, anno 1720 iudices fatales! se fefellerunt.

Carbunculi nequaquam Pesti proprii ha- bentur; Russelus tamen, qui varietates quin- que descripsit, dimidium aegrorum iis affec- tum esse asseruit. A carbunculo communi parùm discrepant, nisi majore ad gangraenam proclivitate. Petechiae nullo modo Pesti

* Medical Sketches.

propriae in variis morbis gravibus occurrunt. In P. Melitensi saepe sese indicârunt, et praecipuè in pectus, pulicum vestigiarum instar, prope finem plerumque morbi emicuerunt. *Maculae* potiùs ut mortis praenuntia quam Pestis signa habendae sunt.

SECTIO CADAVERIS.

De nervorum vitiis parùm scalpello anatomico in lucem prolatum est, atque ad morbum de quo sermo est explicandum vel sanandum minimè adhuc proficit. In exemplo Larrei haec praecipuè notabilia: omentum coloris lutei, maculisque lividis signatum; ventriculus passim gangraenosus; jecur mole auctum, sed alioquin sanum; vesicula felli atra et foetida distenta; pulmones exalbidi liniisque nigris striati; cordis auriculae ventriculique sanguine soluto subnigroque repleti; bronchiae materiâ rubida spumosâque refertae. In alio hepar multò

mole ampliatur erat, et vesicula felli admodum distenta, alia ferè eadem indicârunt; aliquando praeterea signa cerebri malè se habentis patefacta sunt, ejus vasa scilicet sanguine referta, et seri in ventriculis effusio. In Egypto, secundum Doctorem Price, glandulae praecipuè afficiebantur; exemplumque Jacobo M^cGrigor equite memoriae proditum est, quo glandulae inguinis pondus naturale sexduplo superabant. Porrò aliis renes, intestina, pulmonesque, carbunculis obsessi comperti sunt.

DIAGNOSIS.

Quare Cullenus illust. apertis quasi oculis inter Exanthemata Pestem posuit, res est de qua ratio non facile reddi posset. Inter febres certè annumeranda est; at ubi loci valdè dubito, neque nos praescribere decet; nonnullis autem nunc typho ferè confundi videtur, sed morbo expertis, facilè, ut puto, dig-

noscatur, nisi ipso fortasse Pestis initio, et tunc Proteo ipso mutabilior fugaciorque, in omnes se vertet formas, quod plus vice simplice notavi, pariterque ad synocham vel typhum similitudine accedat; idem docet Swietenius: “Saepe,” inquit, “sub larva aliorum morborum latuit,” &c. “at brevi post prodibant bubones, certissimi Pestis testes, et solitis stipati symptomatis,”* turbidus scilicet visus, ac aeger os quasi ebrii ipsum gerens, subitum morbi impetum, velocissimumque ejus cursum, &c. quod si Pestis tantum typhus vehementior sit, ut nonnullis putasse placet, quare non alter in alterum degenerat?

CAUSAE.

Tot tantisque libris nuperrimè de Pestis contagio scriptis, nunc ea tantummodo max-

* Comment. vol. v.

imè ex utraque parte prolata, quanta brevitate potero, indicabo. Et imprimis nonnullis negatur, “ Pestis contagium antiquis cognitum esse,”* quod eruditione sine profunda facilè refelli potest. Nam ut medicos,† et philosophos sileamus, opinio quasi in ore est omnium ferè scriptorum classicorum quibus familiarissimè utimur; ‡ de eo autem imprimis cecinerunt Ovidius, Virgilius, Lucretiusque :

“ Musaeo contingens cuncta lepore.”

Hoc vero non obstante Pestis contagium ex artificio papali vix annis abhinc trecentis ortum esse asseritur,|| et medicus et poeta Fracastorius contagii inventor ac pater seriò quodam salutatur! §

Ab affirmatione porrò quâ multum pen-

* Researches in the Levant.

† Galen de Feb. Aristot. sect. i.

‡ Thucyd. lib. ii. Diod. Sic. &c.

|| Researches in the Levant.

§ Moseley's Tracts.

dere putatur, “ nullum scilicet morbum in decursu vitae recurrentem contagiosum esse,” parùm probari possit; nam si magni recentioribus nominis habeatur fides, variola ipsa contagio carere ratione pari probata esset; quin parùm valet cavillatio, quoniam rarissimè in eodem homine revertitur Pestis; hoc enim docent Russelus, Diemberbroëckeus, et Samoilowitz qui nullam in Moscoviâ reverticulum vidit, et medicus Melitae prim. ita loquitur: “ A mia cognizione nessuna persona ebbe la vera Peste piu d’una volta.”* Porrò eadem in Pestis historia Atticensis a Thucydido narrantur. Sit ita autem, variolam nunquam reverti, saepissime Pestem, sequitur idcirco alteram contagiosam esse alteram non? Reverà autem de rei praesentiâ, tam tenuis quam contagium parum verbâ mera valent, neque negare vellem, me inter Pestem Melitae grassantem nonnullos vidisse, qui quanquàm contagio objecti morbum tamen miris

* Researches, tome ii.

evaserunt modis ; atque ego ipse contactum post crebrum ac liberum, contagium omnino effugi ; tantae autem pro ejus praesentiâ magnitudinis testimonium fuit, ut id existere nullo modo dubitare potuissem. Hoc imprimis confirmatur, bonis separationis eventis ; morbo serie potiùs continuatâ quam multos simul homines adoriente, testaturque auctor* clarus omnique fide dignus, se dum in Egypto fuerit, exempla Pestis fere omnia ad unum indagare potuisse ; clade sine discrimine maxima ; praeterea ex investigatione senatûs recente videtur duos tantum medicorum compertos esse qui Pestis contagium omninò denegârunt.

An alias praeter contagium causas agnosceat Pestis, non adhuc inter medicos constat, neque defuerunt qui summâ vi contenderent, “ morbos contagione ortos nunquam alio modo gigni ;” † quod planè pro-

* M'Grigor's Sketches.

† Bancroft on Yellow Fever, et Sequel.

batione caret; quis enim primas morborum fontes recludere potis est? Jamdudum scripsit Diemerbroeckeus: “Contagium est morbi primò soboles, postea causa, nam qui primus Peste correptus fuit, illam a contagio non contraxit.” Neque aliter censuit Swietenius: “Non possumus,” inquit, “dubitare quin primus mortalium, qui variolis laboraverit, hunc morbum receperit sine contagio; si ergo semel potuerit morbus hic nasci ab aliis quibusdam causis, quas me ignorare lubens fateor, potuit et reproduci a similibus, licet contagium desit.”* At nunquamne de novo nascitur typhi contagium, nunquamne phagedaena gangraenosa? Quod meo animo contagii theoriam *increati* totam subvertere sat est. Praeterea ex iis qui de Peste Aegyptiaca scripserint analogiâ saltem apparet:

“Satis haec tellus nobis coelumque mali fert,
Unde queat vis immensi procrecere morbi.”

* Comment. tom. v.

Diodoro S., Thucydido, Lucretioque monemur, Pestes temporibus antiquissimis, fere semper ad Aegyptum ut fontem relatos esse, neque aliter habetur adhuc ubi maxime hodie grassatur. Howardo narrârunt medici orae Mediterranii orientalis, Pestes luctuosissimas Aegypti finibus exortas esse, et lues Melitensis, anni 1813, indè recta viâ cum mercibus importasse fere in universùm credebatur. Larreo endemica habetur, Syriae orâ, non secus ac aliis Aegypti regionibus, Alexandria, Rosetta, &c. atque addit, “ En effet elle me paroît dependre de causes propres a chacun de ces pays ;” manifestae nobis dicit ex oppidis malè structis, cum vicis angustis, flexuosis, sordidissimis ; malo incolarum victu, eorum inertia ; cadaverum animalium inhumatorum putredine, coemeteriis apertis et similibus oriri.* Ferè eadem Jacobo M'Grigor equite, Meadeo, Desgenettes, † Salze, †

* Larrey, Memoire sur la Peste.

† Histoire de l'armée de l'Orient.

&c. notantur; cumque ad hancce aëris inquin-
 nationem accedit Nili decrementum, anni
 tempore favente, advenit auster (Khamsyn)
 et flabro torrido evolutionem ejus lethalem
 efficit. Ab hujus autem indagazione Syden-
 hami absterret sententiâ, “At vero,” inquit,
 “quae qualisque sit illa aëris dispositio a qua
 morbificus hic apparatus promanat, nos pari-
 ter ac complura alia, circa quae vecors
 arrogans philosophantium turba nugatur,
 planè ignoramus.”*

Inter causas praedisponentes multum ex
 coeli temperie, anni tempore, statuque cor-
 poris pendere videtur. Russelo aliisque mo-
 nemur Pestem rarò latè per hyemem gras-
 sari, magisque vere, maxime mense Junio
 valere, in Julio labescere, ferè Augusto eva-
 nescere; verùm in Aegypto plerumque sub
 Junii finem quiescit; in Russia per hyemem
 grassabatur. Summa caloris atque frigoris
 Pestem similiter extinguere dicitur, non

* Opera Sydenh. sect. ii. cap. ii.

semper autem constat, in Peste enim Melitensi coeli mutationes minime valuerunt, ibi Aprile anni 1813 emicare coepit, in Junio ac Julio exarsit, et Martem circiter anni sequentis omninò denique resedit.

Russelus cum aliis Idyosyncrasiam existere arbitratur, quae contagio corpus humanum obnoxium vel aversum reddat; Larreus phlegmaticos quam alios minos a Peste alienos censuit. Inter mentis pathemata, metus proclivitatem ad morbum summam inducere dicitur.

Quo modo Pestis contagio afficiatur corpus, sive pulmonibus scilicet, sive absorbentibus, sive ventriculo, omnino in tenebris obducitur, neque multum ad rem pertinet; ratione autem triplici agere videtur, contactu, fomitibus, atque aëre. De primo ita loquitur Bancroftius, “ Plague is communicated by immediate contact only;” * neque aliter putant magni plerique nominis, cum quibus tamen, quatenus ex usu proprio expertus

* Essay on Yellow Fever.

sim, minime consentire possum. Quamdiu in fomitibus contagium vim retineat incertum est; de Mertins Pestem Massiliensem hoc tantùm modo impertiri putavit. De spatio per quod transmitti possit parùm adhuc cognitum est; secundùm Russelum vix ultra spatium breve diffundi queat. Intervallum ex contactu ad morbi accessionem ex biduo usque ad triginta quatuor dies variare dicitur; Russelo nunquam post nonum vel decimum diem sese ostendere videbatur.

PROGNOSIS.

In morbo adeo mutabili ea indicare quae spem vel periculum certum ostenderent sanè haud facile est; dixit Russelus nihil certum praedici posse; pulsus res fallacissima est; plerumque autem signa brevi patescunt quae ferè omnem spem deripiunt, et vertiginem, stuporem, aspectumque sublividum ut res pessimi ominis notavi. Secundum Larreum

febris ac delirium incipienti morbo exitum infelicem celeremque praenuntiant; alii porò anxietatem, ardentiaque praecordia, cum alvo citissima, nec facilè cohibenda, mala inter symptomata ponunt. Haemorrhagiæ proVectiore morbo, tumores sine suppuratione mollescentes vel livescentes, bilisque vomitus frequens, periculum summum ostendunt. Nonnullis carbunculi mala inter praesagia habentur. Petechiae ut lethi praenuntia penè inter omnes notantur. Secundum Russelum aliosque, feminae gravidae hocce morbo affectae raro mortem evadunt. Rurúsque docet F. Luigi de Pavia, post diem morbi nonum vel undecimum aegrum in bona spe esse, plerisque autem arbitratur si nullo signo malo diem 5tum vel 6tum evaserit minimè timendum est.

DE MORBO PRAECAVENDO.

Quomodocunque Peste Melitensi res primum se haberet, felices separationis effectus in clara denique luce apparuerunt. Sine munitia verò non secus ac ventilatione parum valet separatio, quae hoc modo haud tantum inutilis sed etiam exitiosa fiat, vim enim contagiosam quodammodo in unum conflare ideoque incendere tendit: nihil quam inclusionem arctam ac penè suffocantem cum separatione idonea confundere communiùs; hinc aër perniciosissimus ac primam contagii scintillam concipere aptus, et hinc effectus secundos plerique ad domorum reclusionem in Peste Londinensi tribuerunt. Ad delendum contagium acidorum vapores plurimum valere dicuntur; inter ea acidum muriaticum et nitricum maximè ad hocce munus usurpantur, haud multùm autem de eorum usu compertum habeo. Praeterea quos

Pestis contagio esse objectos, cavere oportet, ne intemperantiâ, aut inediâ, aut timore, aut venere nimia, valetudinis praesidia consumuntur; porrò Russelus cum aliis potum vini modicum laudat, Desgenettes exercitationem crebram, vini que spiritum modo exiguo sumptum, Larreus verò coffeam bibere et ulcera aperta tenere admonuerunt; alii nisi post fricationem oleosam, alii nisi veste cerata induti haud aegris accedere audent: verùm talibus parùm confisus, quippe quia morbo saepissime objectus sim, omnia ac impunitus omisi; contagio medio diu vixit valuitque Diemberbroeckeus, “intrepidus, planè,” nobis dicit, “vivebam, nec pericula, nec mortem, nec aliud quidpiam timens.”

CURATIO.

Exemplis nuperrimè alio loco * fusius prolatis, quaeque mihi vidisse et quodammodo tractasse contigit, monemur, quam minimè hoc morbo conamina polleant nostra; hic igitur remedia auctoribus maximè laudata sat annumerasse fuerit.

De sanguinis missione vix cum aliò aliud sentit. Sydenhamus détractiones plenàs commendat, ab eo verò morbus parùm ex usu cognitus est; contrà venaesectio Diemerbroeckeo damnatur, ut ferè ad exitum infelicem viam sternens. Russelus nisi infirmis aut aetate senile vel infantile semel incipienti morbo sanguinem emittere monuit. Dr Whyte in Peste Aegyptiacâ liberrimè sanguinem detraxit, aegroti autem omnes perierunt. Narrat medicus prim. Meliten-

* Sir A. B. Faulkner on the Plague at Malta, Ed. Med. and Surg. Journal, April 1814.

sis * hocce remedium nonnunquam morbi initio profuisse ; ferè in universum autem tunc spem defecisse fertur, atque duobus exemplis ipse sine fructu expertus sum. Apud Aleppum, auctore Russelo, medici omnibus eos advenientibus atque in omni morbi stadio sanguinem detrahunt. Nobis dicit Savaresi in eo spes ejus saepissime delusas esse. Larreus cum opus esset cucurbitulas adhibuit, ait verò missionem sanguinis generalem nisi plenitudine maximâ nunquam esse necessariam. Meadio laudatur venaesectio, de ea dubiè loquitur A. B. Faulkner eques, plerique secundum Howardum orae Mediteranii medici hocce remedium commendant, verò ad summum valde anceps est.

Emetica ferè omnibus periculosa habentur, quippe quae capiti sanguinis impetum, maxime hoc morbo cavendum, augeant ; aliquando verò apud Melitam adhibita sunt, sed nullo, ut accepi, fructu. Russelus sub morbi

* M'Lean's Researches in the Levant.

initium aquam tepidam usque ad vomendum bibere commonuit; et antimonii tartras Lareo prodesse dicitur; meo verò animo semper aliena sunt.

Cathartica imprimis indicantur, atque ad capitis dolorem allevandum remedia ferè sola mihi visa sunt. Laxantia et sales mediè apud Melitam, neque parvo fructu, in usu communi erant. Vanus alvi fluxum ciendi timor Russelum ab iis deterruit, aliquando verò sales et rheum, haustu ex opio paulò post sumpto, commendare aüdet.

Diaphoretica saepe exhibui et exhiberi vidi, nullo sed fructu manifesto; atque Russeli opinioni prorsus assentior, sudorem arte elicatum raro Peste prodesse. Apud Melitam aq. ammon. acet., theriaca, et similia (cinchonâ camphorâ ac acidis postea adhibitis) inter communia erant. Russelo diaphoretica et cardiaca inter remedia efficacissima habentur. Sudor circa diem 2m, 3m, vel 5m, sponte profusus optimam spem praebet, atque saepissimè morbum solvit.

Vesicatoria frustrà expertus sum ; apud Melitam nisi glandularum tumoribus parùm in usu erant. Russelo utilia esse in comata dicuntur.

Hydrargyrus Peste Melitensi paucis exemplis prodesse dicitur ; morbi autem cursus celerrimus, saepe haud extra diem 5tum productus, potiùs ejus usui adversabatur. Verum in Aegypto J. M'Grigor equite, fructu optimo adhibuisse videtur. Calomelane incipere solebat, atque hydrargyrum usque ad salivationem exitu saepe felici tentavit. Doctori M'Lean in calomelane cum opio ac tonicis pro certis in Peste remediis prorsùs fidere lubuit ; hoc vero minime usu comprobatum est. Affusio frigida saepissime juvat. Narrat Desgenettes nonnullos Peste laborantes aëri frigido atque humido subito objectos omninò sanos fecisse. Tonica provectiori morbo plerisque utilia habentur. Doctore M'Lean nunquam non tempestiva putantur ; contra J. M'Grigor eques stimulantia ferè omnia nocere asseruit. Cardiaca anxietatem moles-

tam submovent; acida plurima aquâ diluta pro potu ordinario in Peste ferè ubique gentium usurpantur.

Bubones plerumque, ut auctor est Russellus, ad salutem ullo sine remedio procedunt, cataplasmatibus prout res postulat ad maturacionem perducendi et postea siccandi sunt. Larreus nondum maturos scalpello aperuit. De carbunculis ferè eadem notanda, ut facilis nimirum puri exitus detur, Dixit Russellus ut penè sine auxilio sanandi sint.

FINIS.